

CBETA電子佛典集成

CBETA Chinese Electronic Tripitaka Collection
eBook


X25n0501

金剛經如是經義

清 行敏述

財團
法人

佛教電子佛典基金會



目次

- [編輯說明](#)
- [章節目次](#)
 - [經題](#)
 - [法會因由分第一](#)
 - [善現起請分第二](#)
 - [大乘正宗分第三](#)
 - [妙行無住分第四](#)
 - [如理實見分第五](#)
 - [正信希有分第六](#)
 - [無得無說分第七](#)
 - [依法出生分第八](#)
 - [一相無相分第九](#)
 - [莊嚴淨土分第十](#)
 - [無為福勝分第十一](#)
 - [尊重正教分第十二](#)
 - [如法受持分第十三](#)
 - [離相寂滅分第十四](#)
 - [持經功德分第十五](#)
 - [能淨業障分第十六](#)
 - [究竟無我分第十七](#)
 - [一體同觀分第十八](#)
 - [法界通化分第十九](#)
 - [離色離相分第二十](#)
 - [非說所說分第二十一](#)
 - [無法可得分第二十二](#)
 - [淨心行善分第二十三](#)
 - [福智無比分第二十四](#)
 - [化無所化分第二十五](#)
 - [法身非相分第二十六](#)
 - [無斷無滅分第二十七](#)
 - [不受不貪分第二十八](#)
 - [威儀寂靜分第二十九](#)
 - [一合理相分第三十](#)
 - [知見不生分第三十一](#)

- 應化非直分第三十二
- No. 501-A
- 卷目次
 - 1.
 - 2
- 贊助資訊

編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

No. 501

金剛經如是經義卷上

金剛般若波羅蜜經

金性堅剛。能破萬物。如人有智慧。能斷絕貪嗔癡一切諸相。梵語般若。華言智慧。性體昭融。善破一切煩惱。轉為妙用。梵語波羅蜜。華言到彼岸。眾生作業受苦生死輪迴之地。謂之此岸。諸佛菩薩究竟超脫清淨安樂之地。謂之彼岸。凡夫即此岸。佛道即彼岸。一念惡即此岸。一念善即彼岸。六道如苦海。無舟不能渡。以般若六度為舟航。渡六道之苦海。故云到彼岸。言人之智慧。如金之剛。便可脫離業障。至佛地位。故曰般若波羅蜜經。徑也。學佛之捷徑。即成佛之道路。凡人欲到此路。當內修般若以至究竟。若但能誦說。心不依行。是身外覓佛。向外求經。終不悟理見性。故佛號為金剛般若波羅蜜經。總是要人從凡悟聖。永息迷心也。

○法會因由分第一

說法聚會。由此起因。分者。分也。梁昭明太子。以經文浩繁。故分為三十二分。使人便於講誦也。

如是我聞。

阿難自言如是之法。我從佛聞。明非自說。如者。眾生之性。萬別千差。動靜不一無可比類。無可等倫是者。即是眾生之性。離性更無別法。法非有無謂之如。皆是佛法謂之是。聞者。聽聞也。聽非無聞。亦非有聞。了無取舍。名為真聞。故云。水不離波波是水。鏡水塵風不到時。應現無瑕照天地。又頌曰。猿啼嶺上。鶴唳林間。斷雲風卷。水激長湍。最愛晚秋霜午夜。一聲新雁覺天寒。

一時佛在舍衛國祇樹給獨園。

一時者。當日說法之時。佛。梵語。華言覺。謂能覺悟自性。併覺悟羣生也。孔子曰。西方有大聖人。不治而不亂。不言而自信。不化而自行。正指佛也。生於周昭王時。號曰釋迦。舍衛。波斯匿王所居之國。祇樹。乃匿王太子祇陀所施。舍衛國有名須達拏者。常施孤獨貧人。因稱給孤獨長者。曾往護彌長者家求婚。其家請佛說法。須達拏聞之。心開意解。欲請佛歸。佛令先歸求地。惟祇陀太子有園。遂往求之。太子戲曰。爾布金滿園我即與汝。須達隨運金布之。太子見其意誠。却金許地。同建精舍。請佛說法。故名給孤獨園。佛在此將以說經。

與大比丘眾千二百五十人俱。

梵語比丘。比。破也。邱。煩惱也。言能破除煩惱。華言僧。亦名乞士。上乞法於諸佛。以明己之真性。下乞食於世人。以為世人種福。大比丘。乃得道之深者。佛欲講真空無相妙理。非成材達德之大比丘。安能言下頓悟。故與之俱處於園中。其眾有千二百五十人。具見信從之多。

爾時世尊食時著衣持鉢(至)次第乞已還至本處。

爾時。言彼時。佛為三界之尊。舉世恭敬。故稱世尊。正當喫食之時。著柔和忍辱之衣。持四天王所獻之鉢。乞食於人。佛為王太子。而乃持鉢乞食。欲使後世比丘。不植資產。不生驕慢之意。次第乞者。不擇貧富貴賤。巡門而乞。大慈平等。乞畢。復歸於園。

飯食訖收衣鉢洗足已敷座而坐。

食畢。收衣鉢。無繫戀也。洗足。欲清淨也。敷座。陳設講座也。此說法常儀。智者禪師頌曰。法身本非食。應化亦如然。為長人天福。慈悲作福田。收衣息勞慮。洗足離塵緣。欲證三空理。跏趺示入禪。

○善現起請分第二

善現。須菩提之別名。初生時。其家盡空。相師占之。唯善唯吉。故又名善吉。於大眾中起身。請問佛法。

時長老須菩提在大眾中(至)而白佛言希有世尊。

長老。年高德尊之稱。從座而起。將以請佛說法。偏袒右肩。乃執役服勞之禮。懺悔謝過之儀。右膝著地。右是正道。左是邪道。此用正道以歸依也。合掌。心合於道。道合於心。所以收斂起敬。總是整理威儀。以伸問詞。希有者。讚佛為舉世所罕見。

如來善護念諸菩薩善付囑諸菩薩。

此一段。須菩提請問之詞。而首稱佛曰如來。如者。寂然不動。真性之本體。來者。感而遂通。真性之應用。心常空寂。湛然清淨。無所從來。亦無所去。故稱佛為如來。善護念者。令諸學人。以般若智慧。煉自身心。不令妄起憎愛。沾染六塵。墮生死苦海。惟其善護念故。又善委付囑托諸菩薩。教之奉法而行。念念精進。勿使斷絕。須菩提說此二句。欲佛說法以教人。使人得證佛果。菩薩。即受如來教法之人。為修行者之通稱。在講座者甚眾。故曰諸菩薩。

世尊善男子善女人(至)應云何住云何降伏其心。

善男子。正定心也。善女人。正慧心也。調能決斷定慧。永無退轉也。阿。無也。無諸垢染也。耨多羅。上也。三界無能比也。三。正也。正見也。藐。徧也。一切有情。無不徧有。三菩提。知也。知一切有情皆有佛性。梵語阿耨多羅三藐三菩提。華言無上正等正覺。謂真性也。得此性者。所以為佛。超脫三界。不復輪迴。住。謂止而不遷。降伏。謂能制之御之。須菩提發問曰。若善男子善女人。發求正覺之心。應當於何所安住。一切眾生躁擾不停。猶如飄風動搖隙塵。念念相續。無有閒歇。若欲修行。當以何道降伏其意。欲世尊指示用功法則。川禪師云。這問從甚處出來。頌曰。你喜我不喜。君悲我不悲。雁思飛塞北。燕憶舊巢歸。秋月春花無限意。箇中只許自家知。

佛言善哉善哉須菩提(至)善付囑諸菩薩。

佛讚須菩提所說。如來二句甚善。能知我意。善教諸人不起妄念。心常精進。勿令染著諸法相也。

汝今諦聽當為汝說(至)應如是住如是降伏其心。

諦。詳審也。若善男子善女人。發正覺之心。即是當止之地。就此而住。不可暫離。設或妄心萌動。當以此為制御之方。兩如是。言只這裏便是。不必他求。凡夫之心動而昏。聖人之心靜而明。凡夫多被境礙心。事礙理。不知心空境自空。理寂事自寂。心境兩忘。乃是真法。忘境猶易。忘心最難。若不忘心。但欲忘境。境不能忘。反增紛擾。故萬法惟心。若能見性。不生妄念。便是降伏其心也。龐頌曰。世人重珍寶。我貴剎那靜。金多亂人心。靜見真如性。

唯然世尊願樂欲聞。

唯然者。領諾之詞。須菩提聽佛所說。而欣然領諾。願佛廣說。令中下根機。皆歡喜聽受。盡得開悟也。

○大乘正宗分第三

乘。載也。載度一切眾生。乃正大之宗派。

佛告須菩提諸菩薩摩訶薩應如是降伏其心。

摩訶。大也。摩訶薩雖未成佛。實高菩薩一頭地。菩薩念慮清淨。慈悲喜捨。種種方便。化導眾生。摩訶薩雖在塵勞。心常清淨。能化所化。心無所著。乃大悟人也。人心妄念。最易潛滋暗長。故佛告須菩提等。又單提一句應如是降伏其心。言當以此清淨智慧。降伏其妄心也。下文度眾生。而無一毫著相。正是降伏心處。

所有一切眾生之類(至)若非有想若非無想。

一切含靈。謂之眾生。俱有佛性。非獨人也。卵生。禽鳥之類。胎生。人獸之類。濕生。從濕而生。蚊螢之類。化生。變化而生。蠶蛾之類。色是色身。想是思慮。有色者。溺於情識。執有之心。妄見是非之輩。無色者。離情絕欲。執著空相。不修福慧之輩。有想者。眼見耳聞。常起妄念。口說佛法。心不依行。無想者。持靜坐禪。能除一切妄念。猶如木石。不習智慧方便。非有想非無想者。一念寂然不動。似非有想。而實又虛中能照。不是無想。有無俱遣。語默雙忘。無取舍愛憎之心。歷數九類。正所謂一切眾心也。

我皆令人無餘涅槃而滅度之。

我。佛自稱也。令人。使悟入也。無餘者。功行圓滿。清淨自然。全無習氣煩惱。其中安樂。無有餘欠漏隙。涅槃。圓滿清淨

之義。楞嚴經云。涅槃清淨。不生不死之地。一切修行者所依歸。乃超脫輪迴。出離生死。即如來究竟到彼岸地位。滅者。滅盡一切習氣。度者。渡脫生死苦海。佛謂一切眾生。皆因妄念蔽錮。不能作佛。我盡使他同歸覺悟。造到無餘涅槃處。令一切眾生皆受化渡。總見佛心平等。普願與一切眾生。同入圓滿清淨無餘涅槃。同渡生死苦海。同諸佛所證也。

如是滅度無量無數無邊眾生實無眾生得滅度者。

一切眾生。皆從業緣中現出。或生而為人。或生於天上。或生為畜類。或生於地獄。無非自業緣而生。是本無此眾生也。故佛言我雖如此滅度眾生。良由眾生本性原有佛。原自能度。特不能覺悟而名為眾生。即使度盡無限量。無數目。無邊際。如此其多。皆不過還其本然而已。何可言我度他。故曰實無眾生得滅度者。六祖壇經云。自性自度。名為真度。淨名經云。一切眾生本性常滅。不復更滅。文殊菩薩問世尊。實無眾生得滅度者如何。世尊曰。性本清淨。無生無滅。故無眾生得滅度。無涅槃可到。此皆歸之眾生自性耳。華嚴經云。若人欲了知。三世一切佛。應觀法界性。一切惟心造。造化因心偈曰。賦象各由心。影響無欺詐。元無造化工。羣生自造化。

何以故須菩提(至)眾生相壽者相即非菩薩。

佛呼須菩提問曰。何以故度眾生。實無有可度者。菩薩若見有度。便覺為己私計。誇功示能。為貪惡業。是有我相。有我即有人相對。分別爾汝。較量賢愚。為嗔惡業。是有人相。既見有人。未免分別箇種種眾生。觸類生情。偏向執著。為癡惡緣。是眾生相。因有人見眾生見。便不肯平等。自求福利。思量長生於世。為愛惡緣。是壽者相。有此四者形相。則吾心智慧。從而昏

蔽。却與眾生同一迷途。便不是菩薩地位中人。此所以雖度眾生而實無度也。能除四相。即名降伏其心。

○妙行無住分第四

奧妙之行。本無住著。

復次須菩提菩薩於法(至)應如是布施不住於相。

須菩提原從座而起請問。故佛命之復位次。使之定則生慧也。佛言心無四相。此心何所住著。當如雲行於天。水流於地。無所絆礙。俱胝和尚凡見僧來問話。唯豎一指頭。佛鑒禪師頌曰。不用將心向外求。箇中消息有來由。報言達磨西來意。祇在俱胝一指頭。菩薩了悟人法二空。心無取捨。能知聖凡一體。空色一般。善惡一等。內破一切執著。住無所住。龍濟和尚頌曰。心境頓消融。方明色於空。欲識本來面。青山白雲中。是於佛法應當無住。非勉強也。凡夫不識自佛。只向外求。住相迷真。分別他境。不能助道。但求福利。似箭射空。如人入暗。菩薩有此無住之念。行於布施。凡形色。聲音。馨香。滋味。與情所感觸。法所化導。名為六塵。皆是我與眾生共具。要去布施。不見有我為能施人。不見有他為受施者。不見中間有物可施。三體俱無染著。是以智慧性。照見一切皆空。不求果報。菩薩但應如是布施。而不可住於相。修行人有六度。而布施第一。能除我人眾生壽者四相煩惱妄想取舍憎愛之心。清淨行施。不生執著。是不住相布施也。傳頌曰。禪河隨浪靜。定水逐波清。澄清生覺性。亡慮滅迷情。徧計虛分別。由來假立名。若了依他起。無別有圓成。

何以故若菩薩不住相布施其福德不可思量。

菩薩何以不住相布施。蓋菩薩若是無住。遇緣即施。緣散即寂。心中清淨。利益一切。雖不徼福。自然離生死苦。受大快樂。歷

千劫而不古。超三界以長今。其福德自致。不可思惟而量度也。夫佛貴無相。緣何說福得。蓋憫眾生被六塵染著。未可遽化。故以福德無限姑誘之。

須菩提於意云何(至)亦復如是不可思量。

於意云何。佛將欲問之。而教他心中酌量何如。不也世尊。須菩提謂其言不然。佛舉東南西北四維上下十方。言宇宙莫大於虛空。不可思量。菩薩無住相布施所得福德。徧滿虛空。亦如十方廣大。不可得而思量也。川禪師云。可知禮也。頌曰。虛空境界豈思量。大道清幽理更長。但得五湖風月在。春風依舊百花香。

須菩提菩薩但應如所教住。

佛呼須菩提。言此心所應止處。但當如上所說不住相之教。安住其心。要知不住相。即是降伏。若能降伏。心便止而不遷。故曰應住。三昧經云。如來所說法。悉從於無住。我從無住處。是處禮如來。

○經中言語雖多。總是說真空無相妙理。以化度眾生。必眾生能安住降伏。不生我人眾生壽者四相。纔可到涅槃地位。說布施者。不過使修行者。易於入門。原不甚重。一經大義已盡於此。下文不過反覆辨明無相之意。恐人一著有相。便不能安住降伏也。

○如理實見分第五

真如之理。乃真實見解。

須菩提於意云何(至)所說身相即非身相。

上言安住降伏。能成佛果。恐人疑實有佛身可見。不知吾心中自有如來。故問須菩提可以身相。見如來不。須菩提已解佛意。曰不也。色身有相。從地水風火假合成形。法身無相。乃般若真性。有何形體相貌。色身是凡夫。法身是如來。凡夫但見色身。不見法身。故不可以身相得見如來。其故謂何。如來說法時。現此身相。原是幻形。非真實身相也。豈得以此見如來。凡夫謂色身是有。執著修行。不見佛性。生死轉重。如來法身無相。本無生滅。猶若虛空。於何有迹。故言所說身相。即非身相。寶積如來頌。曰凡相滅時性不滅。真如覺體離塵埃。了悟斷常根果別。此名佛眼見如來。川禪師云。且道只今行立坐臥是什麼相。休瞌睡。頌曰。身在海中休覓水。曰行山嶺莫尋山。鶯啼燕語皆相似。莫問前三與後三。

佛告須菩提凡所有相(至)若見諸相非相即見如來。

佛言不特如來無身相可得。即世間凡一切涉於相者。皆是虛而不實。妄而不真。色身是相。中有真實之體。故云皆是虛妄。法身非相。却是真如本體。備乎其中。人若能識破此諸相非真實相。是見色身中有法身。自性中有如來。而如來豈可外求。迴光返照。得見身相。無形可得。是能具智慧性。即為見如來矣。傳頌曰。如來舉身相。為順世間情。恐人生斷見。權且立虛名。假言三十二。八十也虛聲。有身非覺體。無相乃真形。川禪師云。山是山。水是水。佛在甚麼處。頌曰。有相有求俱是妄。無形無見墮偏枯。堂堂密密何曾聞。一道寒光燦太虛。

○正信希有分第六

生真正信向心。此人最為希有。

須菩提白佛言(至)得聞如是言說章句生實信不。

須菩提前言如來無相。恐眾生不親見佛身。徒聞此章句所說佛法。未必能真實信向。故有此問。

佛告須菩提莫作是說(至)能生信心以此為實。

佛恐阻眾生修進之心。故答曰須菩提。莫作是說。雖如來沒後。至後五百歲最遠之時。亦必有持守佛戒。修行善事的人。能於此經中聞得一章一句。信心油然而生。把此經信得鑿鑿皆是真實語者。不因時遠遂無人也。傳頌曰。因深果亦深。理密奧難尋。當來末法世。惟恐法將沉。空生情未達。聞義恐難任。如能信此法。定是覺人心。川禪師云。金佛不度爐。木佛不度火。泥佛不度水。頌曰。三佛儀形總不真。眼中童子面前人。若能信得家中寶。啼鳥山花一樣春。

當知是不於一佛二佛(至)乃至一念生淨信者。

種諸善根。謂一於諸佛所。諸菩薩所。一切尊長之處。恭敬供養。承順教命。一於貧苦眾生。起慈愍心。隨力惠施。一於對諸惡類。自行柔和忍辱。令彼發歡喜心。一於六道眾生。不行欺毀。不加殺害。信心者。謂信般若波羅蜜。能除一切煩惱。能成就一切出世功德。能出生一切諸佛。信自身佛性。本來清淨。無有染污。與諸佛性。平等無二。信六道眾生。本來無相。信一切眾生盡得成佛。可見心為眾善之根本。是人若非清淨其心。何能遽信佛之所說。當知他不止在一二諸佛善人。及四五諸佛善人處培植善根。必已曾於無限量諸佛善人處培植眾多善根。故纔聞是經。便覺心耳相契。從一念清淨不染中。真實聽信。蓋有發生而不可遏者。在五百歲後。尚且必有是人。況近代乎。

須菩提如來悉知悉見是諸眾生得如是無量福德。

悉。皆也。是人能生淨信心。心便與如來相合。進之可以為如來矣。雖是世遠。一切眾生。當得如是無可量度的大福德。豈能逃如來所知所見。言理之必然也。川禪師頌曰。一佛二佛千萬佛。各各眼橫兼鼻直。昔年曾種善根來。今日依前得善力。須菩提。須菩提。著衣吃飯尋常事。何須特地却生疑。

何以故是諸眾生無復我相(至)無法相亦無非法相。

眾生何以得無量福。皆因生淨信心時。無復有我人眾生壽者四相。故於佛法初不泥紙上陳言。不著一法相。亦不離佛氏宗旨。不著一非法相。心生則一切法生。心滅則一切法滅。心既清淨諸法俱空。故無聖賢等見。一切善惡諸法相。諸相盡空如此。故得福如虛空廣大。不可思議也。

何以故是諸眾生若心取相(至)法尚應捨何況非法。

眾生何以諸相皆無也。心本虛圓活潑。不可少有執著。佛與眾生。惟此一心。無形無相。不生不滅。當下便是。動念即乖。猶如虛空。無有邊際。若執取一形相。是著相外求。求之轉失。不離我人眾生壽者四相。此取法相。而偏於有法。取非法相而偏於無法。所取雖不同。俱是著於我人眾生壽者四相。此無智慧者。如何得成佛道。人心不可取相如此。是故不當執取有法。亦不當執取無法。以是不當取之故。佛常常與汝等說。當知我所說之法。譬如渡水之船筏然。人未濟度。須用以渡之。既登彼岸。即棄之而不用。喻人未了悟真性。不可無佛法。既了悟真性。即不須佛法也。夫佛法尚當捨之而不用。何況非佛法者。此其所以不當取也。不然。焉能悉無諸相。而得福德也哉。慈受禪師云。順天門外古招提。爛熳春光照錦谿。物物更無心外法。箇中能有幾人知。川禪師頌曰。得樹攀枝未是奇。懸崖撒手丈夫兒。水寒夜冷魚難覓。留得空船載月歸。

○無得無說分第七

法體空寂。本無所得。亦無所說。

須菩提於意云何(至)如來有所說法耶。

不應取非法。人所易知。若併不應取法。何以漸進佛果。故佛以有所得。有所說法而設疑以詰之。

須菩提言如我解佛所說(至)亦無有定法如來可說。

有定者。執一而無變通也。須菩提曰。若我解悟世尊所說之義。豈是世尊真謂佛有所得。有所說法耶。心本無得亦不言不得。但為眾生所見不同。如來因彼根性。種種方便。開誘化導。指示一。切眾生使其離諸執著。凡妄心生滅不停逐境界。前念瞥起。後念隨覺。覺既不住。見亦不存。可見法原在心中。惟具智慧性者。自能變而通之。原無有定法。可名為無上正等正覺。亦原無定法。使如來可得而說。法華經云。諸根利鈍。精進懈怠。隨其所堪。而為說法。是故法無定相。迷悟懸殊。若未悟時。似無所得。若悟了時。似有所得。得與不得。皆是妄見。但不可執著。自契中道。豈有定法可說耶。川禪師云。寒即言寒。熱即言熱。頌曰。雲起南山雨北山。驢名馬字幾千般。請看浩渺無情水。幾處隨方幾處圓。

何以故如來所說法皆不可取不可說非法非非法。

法之所以無有定者。何也。如來所說之法。都是了悟真空妙理。可以性修。而不可以色相取。可以心傳。而不可以口舌說。凡人執著如來所說文字章句。不悟無相之理。妄生知解。故言不可取。如來為化種種眾生。應機隨量。所有言說。亦何有定。學人不解如來深意。但誦所說眾法不了本心。終不成佛。故言不可

說。說為無法。而法未嘗無。說為有法。而法未嘗有。極是處圓不滯。不可說他非法。非非法。法原無一定可執。況可得而處之乎。傳頌曰。菩提離佛說。從來無得人。須依二空理。當證法王身。有心俱是妄。無執乃名真若悟非非法。逍遙出六塵。川禪師云。是什麼。頌曰。恁麼也不得。不恁麼也不得。廓落太虛空。鳥飛無影迹。咄。撥轉機輪却倒迴。南北東西任往來。

所以者何一切賢聖皆以無為法而有差別。

無為者。以正覺還我真性。本來無假作為。即是無住無住。即是無相。蕩然空寂。鑒覺無礙。乃真是解脫佛法。須菩提又言。所以知如來所說不可取者。何也。觀彼一切賢人若菩薩等。聖人若如來諸佛等。莫不皆用此無為之法而得證果。但悟深者則為佛。悟未深者即為菩薩。其間微有差等分別。而無為却同。所以如來未嘗取一法以為說也。川禪師頌曰。正人說邪法。邪法悉歸正。邪人說正法。正法悉歸邪。江北成枳江南橘。春來都放一般花。

○依法出生分第八

諸佛所依之法。皆從此經生出。

須菩提於意云何(至)是人所得福德甯為多不。

前言法不可取。又恐人不受持經典。故以布施獲福較之。三千大千。總形容世界之多。七寶。金銀琉璃。珊瑚瑪瑙。珍珠玻璃。七寶滿世界。已無限。況曰大千世界。又曰三千大千世界。如是七寶之多。用以布施此人所得福德。多耶。不多耶。蓋布施供養身外之福。受持經典性內之福。身福是衣食。性福是智慧。凡人雖有衣食性中愚迷。是前生布施供養。不持經典者。亦有聰明智慧。而貧無衣食。是前生持經聽法。不布施供養者可知內外雙修。方為全德。

須菩提言甚多世尊(至)是故如來說福德多。

七寶布施。是住相布施。希求福利。獲福雖多。而於明心見性。了無所得。惟依般若波羅蜜多修行。令自性不墮諸有。是名福德性。故人本來性體中原無一物。何嘗有此福德。今以施寶之故。而遂得此福德。是故如來。說福德多。傳頌曰。寶滿三千界。齋持作福田。惟成有漏業。終不離人天。川禪師頌曰。寶滿三千及大千。福緣終不離人天。若知福德原無性。買得春花不用錢。

若復有人於此經中(至)為他人說其福勝彼。

聽聞此經。不可徒以言受。須念念不違其教。方為受而持之。受者。當下承受。持者。時刻不忘。受之不忘於心。持之不厭其久。曉明經義。依教而行。如船入海。無所不通。是名受持。四句偈。不必指那四句。上有乃至二字。下有等字。特舉以該括全部經耳。古今論四句偈者不一。或指聲香味觸法。或指經中二偈。或云若見諸相非相。即見如來。或云眼耳鼻舌。或云有為無為。非有為非無為句。或云有諦無諦。真諦俗諦。各執己見。初無定論。惟天親菩薩請益彌勒。如何是四句偈。彌勒云。無我相。人相。眾生相。壽者相。六祖大師復以摩訶般若波羅蜜多是。若果執此兩轉語。便為倒根。何異數他人珍寶。於自己無半文分。幸而傳大士云。若論四句偈。應當不離身。可見四句偈。不假外求。總在心地了悟也。上既說明布施者必得福。佛遂引人受持此經。悟明真理。乃至四句偈等。拳拳持守而不失。又能為他人講說經偈之義。所獲之福。較七寶布施之福尤勝。

何以故須菩提一切諸佛(至)所謂佛法者即非佛法。

何以知其得福尤勝。觀彼一切諸佛。及諸佛所證無上正覺之法。莫不皆由悟此金剛般若而成正覺。是知此經之義。方且出生一切

諸佛。豈僅得布施之福而已哉。蓋諸佛惟此一心。何法不從心所立。猶如大地。何物不生。故從此經出者。非謂言說章句。乃指般若心性。一切眾生愚迷顛倒。不知覺悟。種種修行。多向身外。無有是處。菩薩於諸佛法。都無染著。見如不見。聞如不聞。心境空寂。自然清淨。故般若之法。雖名佛法。本來無有。佛亦不過假此以開悟眾生。非實有佛法也。人若誤認受持二字謂實有佛法。則著相而不明性。何以福德之勝於布施乎。川禪師云。且道此經從甚處出。須彌頂上。大海波中。頌曰。佛祖垂慈實有權。言言不離此經宣。此經出處還相委。便向雲中駕鐵船。又云。能將蜜菓子。換汝苦葫蘆。頌曰。佛法非法。能縱能奪。有收有放。有生有殺。眉間常放白毫光。癡人猶待問菩薩。

○一相無相分第九

此言四果。似乎有一相。然本自無形何有得果之相。

須菩提於意云何須陀洹(至)是名須陀洹。

須陀洹。梵語。華言入流。與下斯陀含。阿那含。阿羅漢。俱從聲聞而悟道者。上言佛法無相。恐人遂疑佛果難成。故舉四無心得果者發之。須陀洹。知身是妄。欲入無為之理斷除人我執著之相。以無取心。契無得理。無取則心空。無得則理寂。雖能捨羶重煩惱。未能離微細煩惱。此人不入地獄。不作修羅餓鬼異類之身。謂學人悟初果也。夫煩惱者。菩提之根本。若人照了練習。可為出世之法。譬如高原陸地。不生蓮花。蓮花生於淤泥濁水中。愈見煩惱不損菩提。如日月翳於烟雲中。而日月原無損。珠玉落乎泥滓中。而珠玉亦無損。故云。莫管煩惱障。但存菩提心。佛恐諸菩薩不知以無念為念。尚萌所得之念。故設此問呼須菩提曰。須陀洹之果謂能作此念而得之不。須菩提曰。不也。凡人報緣未謝。於人間世上。有許多交涉。應須隨緣處之。令中虛

外順。雖在鬧市沸湯中。亦恬然安穩。若有纖毫見戀。即便打不過。所謂須陀洹者。雖居塵囂世界。厭喧求靜。六塵無染。初入其門。得預聖人之流。然特名為入流。而實無心得此入流之果者也。但因其遇有色聲香味觸法等事。了不相入。故虛名為須陀洹耳。多尊者頌曰。萬行周通能覺性。驅除煩惱更勤修。七生七死方成道。初等陀洹入聖流。

須菩提於意云何斯陀含(至)是名斯陀含。

梵語斯陀含。華言一往來。是第二果視入流又高一級。漸修精進之業。操持更密。念念不住六塵境界。然終未盡能清淨。但前念纔著。後念即覺。猶有此一番生滅念。故言一往來。然色身雖有來去。而法身湛然不動。心既無我。誰云往來。特名為一往來。而實無心得此一往來之果者也。是虛名之為斯陀含耳。傳頌曰。捨凡初入聖。煩惱漸輕微。斷除人我執。創始證無為。緣塵及身見。今者乃知非。一返人天後。趨寂不知歸。

須菩提於意云何阿那含(至)是故名阿那含。

梵語阿那含。華言不來。是第三果。修持又密于二果人。六塵竟不來侵了悟人法俱空。漸修精進已斷欲界思惑。直生兜率天宮。更不來生欲界。是為得不來果。故名為不來。然心空無我。又何為不來。所以名為不來。而實無心得此不來之果者也。惟其實無不來。是故虛名為阿那含耳。川禪師云。諸行無常。一切皆苦。頌曰。三位聲聞已出塵。往來求靜有疏親明明四果元無果。幻化空身即法身。

須菩提於意云何阿羅漢(至)即為著我人眾生壽者。

梵語阿羅漢。華言無生。諸漏已盡。無復煩惱。已悟不生不滅之理是第四果。比三果又進一級。佛言修行者。至於阿羅漢。道將

得矣。亦自謂能作此念而得之不。須菩提曰。不也。所謂阿羅漢者。已悟無生之理。無煩惱可斷。無貪嗔可離。情無逆順。心境俱空。故雖得道。而心實未曾執一樣法特虛名為阿羅漢耳。若作我已得阿羅漢道之念。即著我人等相。與阿羅漢地位相隔。何以稱是名哉。

○四果人。俱說他無心。可見聖賢。皆以無為法。全不住相。但四果只是了一身。不度眾生。佛門謂之小乘。

世尊佛說我得無諍三昧(至)我是離欲阿羅漢。

塵念欲起。我念欲遣。彼此各不相下謂之諍。心無生滅去來。惟本覺常照謂之無諍。此就是脫離人欲。故云離欲阿羅漢。三昧。梵語。華言正定。亦云正受。謂入定之法正。而定中所受境界。非是妄想。須菩提曰。我說四果人。無心得果。非是我摹擬之見。但據我自身看來。佛嘗稱我得無諍之道。渾然若太虛無著。不徒是三昧中人乃三昧中人最為第一。是第一離欲阿羅漢。然佛雖如此稱我。我實不作得是離欲阿羅漢之念也。川禪師云。把定則雲橫谷口。放行則月落寒潭。頌曰。喚馬何曾馬。呼牛未必牛。兩頭都放下。中道一時休。六門迸出遼天鷗。獨步乾坤總不收。

世尊我若作是念(至)名須菩提是樂阿蘭那行。

阿蘭那。華言無諍。須菩提言。我若作是思念而得此道。即為不離欲。即是有諍心。佛則不於諸弟子中。獨稱說善現是好樂無諍之行。惟我終日修行。實無心得此無諍之行。故世尊加我名曰。須菩提是。樂阿蘭那行者。所以說我為第一。我無心而得果如此。則四果之人無心得果。不益信乎。傳頌曰。無生即無滅。無我復無人。永除煩惱障。長辭後有身。境忘心亦滅。無復起貪

嗔。無悲空有智。翛然獨任真。川禪師云。認著依前還不是。頌曰。蚌腹隱明珠。石中藏碧玉。有麝自然香。何必當風立。活計看來恰似無。應用頭頭皆具足。

○莊嚴淨土分第十

齋莊嚴飾。是清淨心地。

佛告須菩提於意云何(至)於法實無所得。

然燈佛。即定光佛。生時身光如燈。後至成佛。故名然燈。是釋迦佛受記之師。上雖言無心得佛果。畢竟得字不曾去。終著一分相。故佛問曰。我昔日於本師處聽法。於法有所得不。須菩提曰。不也。世尊。如來在然燈佛所。於法雖因師開示。良由自性本來清淨。本無塵勞。寂然常照。覺悟成佛。實非於師處聽聞而得之也。若有所得。甯免有心之累。傳頌曰。昔時稱善慧。今日號能仁。看緣緣是妄。識體體非真。法性非因果。如理不從因。謂得然燈記。甯知是舊身。

須菩提於意云何(至)即非莊嚴是名莊嚴。

佛土。即菩提心。莊嚴者。心常清淨。不向外求。任運隨緣。一無所得。行住坐臥。與道相應。無妄念。皆清淨之謂。我既無所得。是外不染六塵。內無私欲邪心之累。則菩薩修行時節。是何可以有心求莊嚴。故問須菩提曰。為菩薩者。果成莊嚴佛土不。須菩提曰不也。性如太虛。原無所謂莊嚴今以黃金為地。七寶為林。皆外飾之事。非莊嚴也。至于真性中。自有六度萬行。布施戒定慧等一切善法。皆是莊嚴。只不可使有妄念夾雜。是虛名為莊嚴耳。豈可有心以求之乎。傳頌曰。掃除心意地。名為淨土因。無論福與智。先且離貪嗔。莊嚴絕能所。無我亦無人。斷除俱不染。穎脫出囂塵。川禪師云。娘生袴子。青州布衫。頌曰。

抖擻渾身白勝霜。蘆花雪月轉爭光。幸有九臯翹足勢。更添朱頂又何妨。

是故須菩提諸菩薩摩訶薩(至)應無所住而生其心。

佛言。心不可知有莊嚴佛土。是故汝等諸修行人。當知此心。常自空寂。無諸妄念。不生不滅。不動不搖。如此清淨。凡修六度萬行者。應如是生清淨心。不當有所執著而生其心。若住著色聲香味觸法六塵上而生其心。非清淨也。凡夫無明起滅。妄想顛倒。取捨聖凡善惡等見。是名濁亂心。因境來觸。遂生其心。如猿猴捉月。病眼見花。一切萬法。皆從心生。心有所住。即是妄念。六塵競起。譬如浮雲。往來不定。若悟真空。即無所住即是智慧。無諸煩惱。可見諸菩薩欲得阿耨多羅三藐三菩提者。豈應如是生住著於六塵的心。惟應於無所住著處生心。則此心生而不容己。一真如無染之心也豈不清淨。既曰清淨。何等莊嚴。譬如天平。盤中無物。其心自正。說一生字。便見佛法雖重無相。何嘗教人槁木死灰。川禪師云。雖然恁麼。爭奈目前何。頌曰。見色非干色。聞聲不是聲。色聲不礙處。親到法王城。又云。退後退後。看看。頑石動也。頌曰。山堂靜夜坐無言。寂寂寥寥本自然。何時西風動林野。一聲寒雁唳長天。

須菩提譬如有人(至)佛說非身名大身。

此譬喻心之大也。人心能生萬變萬化。既從此出。故以須彌山王喻之。須彌山。高廣三百三十六萬里。日月遶山而行。以為晝夜。由此而分四面為四天下。其上有三十三天。可謂至大為眾山之王。人身豈有如是之大者。佛說人心充滿六虛。遊於清淨。誠足以塞天地。貫古今。是託名之為大身。非實說有大身也。人不求之清淨。而求有得。求莊嚴得毋反小視其心乎。川禪師云。設有。向甚處著。頌曰擬把須彌作幻軀。饒君膽大更心羸。目前指

出千般有我道其中一也無。便從這裏入。傳頌曰。須彌高且大。將喻法王身。七寶齊圍繞。六度次相鄰。四色成山相慈悲作佛因。有形終不大。無相乃為真。

○無為福勝分第十一

持經度人。無假作為。其福最勝。

須菩提如恒河中所有沙數(至)尚多無數何況其沙。

西土有河。名曰恒河。周圍四十里。與佛說法處相近。故佛取之為喻。恒河中沙。極細而多。將一粒沙。比一河。則有無量恒河。再將無量恒河中所有沙。總而算之。則多多無盡矣。故須菩提曰。諸恒河尚且極多。無可算數。何況其中之沙乎。川禪師云。前三三。後三三。頌曰。一二三四數恒沙。沙等恒河數更多。算盡目前無一法。方能靜處薩婆訶。

須菩提我今實言告汝(至)而此福德勝前福德。

實言者。言非虛謬。欲人信也。以諸河中之沙。一粒沙算一三千大千世界。極形容世界之甚多也。受持四句偈等。雖不比施七寶之多。實智慧心生於我矣。又能為他人解說。則人人俱得證佛果。成無上道。故所獲福報。尤勝于布施。可見人必當持經。為人解說。或有云布施。為六度之首。此言福德。不如持經者。何也。蓋七寶布施。雖無吝惜。畢竟有七寶方遂心。若無七寶。便不能布施。然要知七寶雖多。不過人間有限之物。布施以此。但受人間有限之福。財施有盡。法施無窮。財施不出欲界。法施能超三界。若於此經中。受其義理而持守之。則已不為惡業所縛。可以悟明真性。又為他人解說。使人亦得聞此至理。共明真性。久而善根皆熟。可以脫離輪迴。永超生死。是持經度人。窮亦可。達亦可。日日可行。處處可行。無窮無盡。福德豈不溥哉。

智者禪師頌曰。恒河數甚多。沙數更難量。舉沙齊七寶。能持智慧漿。有相皆為幻。徒言智慧強。若論四句偈。此福未為長。川禪師云。真鍮不換金。頌曰。入海算沙徒費力。區區未免走塵埃。爭如運出家中寶。枯木生花別樣春。

○尊重正教分第十二

佛教正大。受持者。天人皆生敬重。

復次須菩提隨說是經(至)皆應供養如佛塔廟。

須菩提。歷歷與佛辨析。不敢安坐受教。故佛又命之復位次而告之曰。為人解說。不必有揀擇。隨所在之處。見人即便演說此經。心無分別。雖至四句。偈等甚少。當知此說經之處。即是如來說法之地。令諸聽者。生清淨心。無諸妄念。悟得本來佛性。即此幻身。便是法身。中有如來全身舍利。感得天上之神。世間之人。八部鬼神中之惡類阿修羅等。皆當以華香瓔珞。幢幡繒蓋。香油蘇燈。恭敬供養。如藏佛遺體舍利之塔。設立殊特佛像之廟。傳頌曰。恒沙為比量。分為六種多。持經取四句。七寶詎能過。法門遊歷處。供養感修羅。經中稱最勝。尊高似佛陀。

何況有人盡能受持讀誦(至)即為有佛若尊重弟子。

止於此地講說經中四句偈。尚能有感動。何況有人盡能持誦全經者乎。應知此人所成就之法。乃最上第一希有之法也。甯不愈感天人等恭敬耶。經典感通之妙如此。則知經在之處。即如佛在其處。即是佛與弟子菩薩等俱在其處。人若見經。即自見佛。安得不持誦講說。凡人自心誦得此經。自心解得經義。自心體得無相無著之理。所在之處。常修佛行。念念無有間歇。心常清淨。不生不滅。無諸妄念。便可立地成佛。可見即心是佛。故言所在之處。即為有佛。尊重弟子。謂菩薩等。能悟無相妙理。有可尊重

也。川禪師云。合如是。頌曰。似海之深。如山之固。左旋右轉。不去不住。出窟金毛獅子兒。全威哮吼眾狐疑。深思不動干戈處。直攝天魔外道歸。杲禪師頌曰。即心是佛無餘法。迷者多于心外求。一念廓然歸本際。還如洗脚上船頭。僧問首山。如何是佛。山答。新婦騎驢阿家牽。鼓山珪禪師為作頌云。阿家新婦兩同條。咫尺家鄉路不遙。可笑騎驢覓驢者。一生錯認馬鞍橋。

○如法受持分第十三

依佛所說之法。承受而持守之。

爾時須菩提白佛言世尊(至)是名般若波羅蜜。

須菩提見如來讚美經典。因請此經。當屬何名。使我等奉事此經而持守之。佛曰。明此經者。其智慧如金之剛利。能斷絕一切有相之物。除一切邪妄之念。直至諸佛菩薩之彼岸。名為金剛般若波羅蜜。以是名字。汝當奉而持之。只在自心。行住坐臥。勿令分別。便能斷一切疑執。然法性即空。不可執此為相。悟明本性。湛若太虛。體尚且無。何名之有。如來恐人生斷滅見。不得已而強安是名。故虛名為般若波羅蜜。以接引眾生。隨說隨掃。惟恐人住于相也。歸宗禪師云。有座主來參。值宗鋤草。見一蛇。斬之。主云。久向歸宗。元來是箇驢行沙門。宗云。是爾驢。我驢。且道這僧。過在什麼處。昭禪師為作頌曰。廬嶽宗師接上機。斬蛇特地施慈悲。癡迷座主生驚怖。却道驢心惹是非。

須菩提於意云何(至)白佛言世尊如來無所說。

本心原淨。諸法原空。更有何法可說。二乘之人執著人法是有。即有所說。菩薩了悟人法皆空。却無所說。佛蓋強名為金剛經。未嘗實指經中。曰此是何等法。安得為真有般若波羅蜜之法。寒山子云。吾心似秋月。碧潭光皎潔。無物堪比倫。教我如何說。

川禪師云。低聲。低聲。頌曰。入草求人奈何。利刀斷了手摩挲。雖然出入無踪跡。文彩全彰見也麼。

須菩提於意云何三千大千(至)非世界是名世界。

怎見得法無可說。今三千大千世界。以無量因緣乃成。一切眾生。豈外此而別有世界。悟者處此。迷者亦處此。悟者之心清淨心也。以此心處此世界。即清淨世界。迷者之心塵垢心也。以此心處此世界。即微塵世界。世界許多。而微塵亦不勝其多。使一切眾生。皆生清淨心。非微塵所可污。故云非微塵。得出世間法。非世界所能間。故云非世界。在世離世。在塵離塵。可見實非有微塵之定形也。不過虛名為微塵。如來說世界。亦非實有世界之定形也。一切山崖。會有崩裂。一切江河。會有枯竭。不過虛名為世界云耳。若必說佛有法。是微塵實有微塵。世界實有世界。只此一念。便不清淨。何以究竟作佛。故古德云。一念不生全體見。六根纔動被雲遮。傳頌曰。積塵成世界。析界作微塵。界喻人天果。塵為有漏因。塵因因不實。界果果非真。果因知是幻。逍遙自在人。

○圓悟禪師上堂云。十方同聚會。箇箇學無為。此是選佛場。心空及第歸。大丈夫。具決烈志氣。慷慨英靈。踏破化城。歸家穩坐。外不見一切境界。內不見有自己。上不見有諸聖。下不見有凡愚。淨裸裸。赤洒洒。一念不生。桶底子脫。豈不是心空。到這裏。還容棒喝麼。還用元妙理性麼。還容彼我是非麼。直不如紅爐上一點雪相似。豈不是選佛場。然雖如是。猶涉階梯在。且問涉階梯句作麼生道。千聖會中無影迹。萬人叢裏奪高標。

須菩提於意云何可以三十二相(至)是名三十二相。

三十二相者。謂眼耳鼻舌身五根中。具修六波羅蜜調布施持戒忍辱精進禪定智慧是也。于意根中修無住無為。是三十二相清淨行。即心成佛。原不在相好莊嚴上。若據如來妙相。本性湛然空寂。一相尚不可得。豈可以三十二相而求見。欲見如來。即我有覺悟心是也故如來三十二相。雖若異於眾生。然亦與眾生幻形同歸有盡。非是真實相也。但名為三十二相耳。川禪師云。借婆衫子拜婆年。頌曰。你有我亦有。君無我亦無。有無俱不立。相對嘴盧都。

須菩提若有善男子善女人(至)為他人說其福甚多。

世人所重者。莫過於身命。若知身是幻相。即以身命布施。不認為己有。固較之施七寶者不同。然畢竟不明本性。如生豪貴之家。驕奢縱恣。難免造業。反受業報。縱使捨身如沙數之多。爭如受持四句偈等而解說之。使人我同登彼岸。其福豈不甚多。夫捨身尚不如持經度人。人何可不以持經為急務。傳頌曰。施命如沙數。人天業轉深。既掩菩提相。能障涅槃心。猿猴探水月。蘭[廿/殤]拾花鍼。愛河浮更沒。苦海出還沉。又頌曰。經中稱四句。應當不離身。愚人看似夢。智者見唯真。法性無前後。無中非故新。蘊空無實相。憑何見有人。川禪師云。兩彩一賽。頌曰。伏手滑槌不換劍。善使之人皆總便。不用安排本現成。箇中須是英靈漢。囉囉哩。囉哩囉。山花笑。野鳥歌。此時如得意。隨處薩婆訶。

○離相寂滅分第十四

脫離一切形相。則真心寂靜。妄念消滅。

爾時須菩提聞說是經(至)未曾得聞如是之經。

須菩提是阿羅漢。於五百弟子中。解空第一。大徹悟真空無相義趣。傷共覺悟之晚。不覺涕淚悲泣曰。希有。世尊。佛說如是甚深經典。我從昔來。雖有得於慧眼實未曾得聞是經。蓋具慧眼。但知得萬法皆空。今併其空亦遣之。所以感極而涕零也。傳頌曰。聞經深解義。心中喜且悲。昔除煩惱障。今能離所知。遍計于先了。圓成證此時。宿乘無閼慧。方便勸人持。川禪師云。好笑。當面諱了。頌曰。自小生來慣遠方。幾回衡嶽度瀟湘。一朝踏著家鄉路。始覺途中日月長。

世尊若復有人得聞是經(至)成就第一希有功德。

須菩提言。我得慧眼者。今日纔聞此經。世之眾生。豈有聞而遂信者。如人聞此經。信于心。使心中常是清淨。則萬法當前。自然了徹。真實之相即從此無相中生發出來。譬如鑑空。即能照也。當知是人。決定成就諸佛功德。莫有過之者。豈非第一希有。變福言功者。功成果滿。福不足道也。傳頌曰。未有無心境。曾無無境心。境亡心自滅。心滅境無侵。經中稱實相。語妙理能深。證知惟有佛。小聖詎能任。

○佛說無相。但去妄念。不去天理。若併天理去了。未免行尸走肉。虛生世間。故說出生實相三字。亦慮人之流于枯槁也。世儒不去細究。反言佛氏虛無寂滅。豈不罪過。

世尊是實相者即非相是故如來說名實相。

雖曰實相。其實無相。但就無相中能生照心。比之頑空者不同。故言為非。不是竟言無。如龜毛兔角。只說龜無毛。兔無角。不說無龜毛兔角。只說實相無相。不說無實相。達磨曰。若解實相。即見非相。正猶水中鹽味。色裏膠青。決定是有。不見其形。是故如來。虛名之為實相傳頌曰。眾生與壽者。蘊上立虛

名。如龜毛不實。似兔角無形。川禪師云。山河大地。甚處得來。頌曰。遠觀山有色。近聽水無聲。春去花猶在。人來鳥不驚。頭頭皆顯露。物物體元平。如何言不會。只為太分明。

世尊我今得聞如是經典(至)一切諸相即名諸佛。

須菩提言。我今得聞如是經典。幸有如來現在。得之於耳提面命。故信其言。解其義。信受而持守之。何難之有。獨以世尊滅度後。歷五百歲之久。去聖人遼遠。眾生之中。若能信解受持。心常清淨。不著諸相。悟住無所住心。了得無所得法。此是第一流人。可謂絕無而僅有。何故而獨能信解受持此經。其人必無我人等四相。所以能悟般若波羅蜜甚深經典。信解受持也。又須知是人。所以能持是經。而無四相者。何也。彼能知四相本來不生。即非四相義也。何以知四相非相也。所造之地。有智慧心。能離一切諸相。解悟三空。契合實相。究竟涅槃。三世如來同證此理。即稱諸佛矣。傳頌曰。空生聞妙理。如蓬值在麻。凡流信此法。同火出蓮花。恐人生斷見。大聖預開遮。如能離諸相。定入法王家。川禪師云。若不得後語。前話也難圓。頌曰。難難難。如平地上青天。易易易。似和衣一覺睡。行船盡在把梢人。誰道波濤從地起。又云。行住坐臥。著衣吃飯。更有什麼事。頌曰。冰不熱。火不寒。土不濕。水不乾。金剛腳踏地。幡竿頭指天。若人信得及。北斗面南看。又云。心不負人。面無慚色。頌曰。舊竹生新筍。新花長舊枝。雨催行路客。風送片帆歸。竹密不妨流水過。山高豈礙白雲飛。

佛告須菩提如是如是(至)當知是人甚為希有。

須菩提所解空義。契合如來之旨。故深然之。不驚。無駭愕心。不怖。無懼怯心。不畏。無阻難心。佛恐世遠僅存言教。人或有此三心。則信解受持未必堅固。故稱是人甚為希有。傳頌曰。如

能發心者。應當了二邊。涅槃無有相。菩提離此緣。無乘及乘者。人法兩俱捐。欲達真如理。應當識本源。川禪師云。祇是自家的。頌曰。毛吞巨海水。芥子納須彌。碧漢一輪滿。清光六合輝。踏得故鄉田地穩。更無南北與東西。

何以故須菩提如來說第一(至)是名第一波羅蜜。

何以言其希有。是經為萬法之綱。三世諸佛皆從此成。為第一彼岸。波羅蜜有十種。一布施二持戒。三忍辱。四精進。五禪定。六智慧。七慈。八悲。九方便。十不退。今言第一波羅蜜。以布施資生眾善。直至菩提。登彼岸。豈真有哉。特立是名以證持經有益耳。傳頌曰。波羅稱彼岸。於中十種名。高卑緣妄識。次第為迷情。焰裏尋求水。空中覓響聲。真如何得失。今始號圓成。川禪師云。八字打開。兩手分付。頌曰。是名第一波羅蜜萬別千差從此出。鬼面神頭對面來。從此莫道不相識。

須菩提忍辱波羅蜜(至)是名忍辱波羅蜜。

不但持經可登彼岸。修行人。亂真性者莫如辱。能忍耐不起嗔心。則亦可登彼岸。然忍僅是藏蓄之意。工夫一懈。終不能忍。又不如與忍俱忘。蓋真性中原無辱可忍。不過虛名以勸人。太陽禪師舉火。問僧云。會麼。僧云。不會。師云。起則遍周沙界。滅則了無所得。龐居士問馬祖云。不與萬法為侶。是什麼人。祖云。迴光自照看。待你一口吸盡西江水。然後向你道。

何以故須菩提如我昔為(至)無眾生相無壽者相。

梵語歌利王。指無道極惡君。佛昔修道山中。有諸宮女。從王出獵。因王倦寢。諸宮女見佛。以為仙也。遂環集佛所禮拜。王覺。大怒。將刀割截佛之身體。天怒雨石乃免。何以見無心忍辱。佛言。我遭此凌辱之時。惟無我人等四相故忘其辱。亦忘其

為忍辱。縱被割截無所顧慮。若使我於往昔。被歌利王。欲將我身[歹*桀]裂時。有一毫我人等相。則嗔恨之心。必有不忍過者。亦何能忍辱如此。不但於歌利王如此。猶思憶過去五百世時。知此身原是假合。因單修忍辱之道。作忍辱仙人。我已脫離四相久矣。所以忍辱。而不住忍辱之相。傳頌曰。暴虐唯無道。時稱歌利王。逢君出遊獵。仙人橫被傷。頻經五百世。前後極時長。承仙忍辱力。今乃證真常。川禪師云。智不責愚。頌曰。加刀斷水。似火吹光。明來暗去。那事無妨。歌利王。歌利王。誰知遠烟浪。別有好商量。又云。目前無法。從教柳綠花紅。耳畔無聲。一任鶯啼燕語。頌曰。四大元無我。五蘊悉皆空。廓落虛無理。乾坤萬古同。妙峯嶷嶷常如故。誰管顛號刮地風。

○肇法師曰。五蘊身非有。四大本來空。將頭臨白刃。一似斬春風。歌者。即慧之別名。利者。刀也。非謂世間之刀。王者。心也。是用慧刀。割截無明煩惱之身體也。應生嗔恨者。謂色身與法身不同。當知割截之時。即不見有身相。亦不見有我人等四相。何處更有嗔恨也。

○圓悟禪師云。大凡為善知識。應當慈悲柔和。善順接物。以平等無諍自處。彼以惡聲色來加我。非理相干。訕謗毀辱。但退步自照。勿與較量。亦不嗔恨。久之魔孽自消。若與之較。即惡聲相反。豈有了期。且見性之人。聞人毀謗。如飲甘露。心自清涼。不生煩惱。則能成就定慧之力。不被六賊盜竊家寶。功德法財。遂從此增長。今人或被言語小嫌。或為錢財得失。往往毀情爭鬪。構訟經年。骨月而成讐敵。觀此甯不猛省。

是故須菩提菩薩應離一切(至)若心有住即為非住。

口非住住字。作止字看。餘皆言染著也。佛言。據我忍辱不住相看來。今諸菩薩。欲求無上道果。發無上道心者。又豈可少住

相。當離一切相以。發正覺心。然後可以成佛。不可住於聲色香味觸法而生心也。蓋真心中。初無色聲等。故六祖云。我於此法。無住為本。華嚴云。一切境界。不生染著。淨身口意。住無礙行。滅一切障。世間受生。皆由著我。若離此著。則無生處。涅槃經云。凡夫著色。乃至著識。以著識故。則生貪染心。故為所縛。乃至為識之所繫縛。以繫縛故。則不得免生老病死憂悲大苦一切煩惱。於此能生無所住著之心。便是居塵出塵。纔合於阿耨多羅三藐三菩提法。不然。心便不能脫灑。即非菩薩之所當止。色聲等。人人皆有。但一沉溺於中。却生出許多煩惱貪吝心。便不能全智慧。得證佛果。佛所以屢屢戒之。察禪師心印頌曰。問君心印作何顏。心印何人敢授傳。歷劫坦然無異色。呼為心印早虛言。須知體似虛空性。意似紅爐火裏蓮。莫謂無心云是道。無心猶隔一重關。川禪師云。是。即此用。離此用。頌曰。得之於心。應之於手。雪月風花。天長地久。朝朝雞向五更啼。春來處處山花秀。

○圓悟禪師云。在家菩薩。修出家行。如火中生蓮。蓋名位權勢意氣。卒難調伏。而況火宅煩擾熬煎。百端千緒。除非自_己直下明悟本性妙圓。到大寂大定休歇之場。方能放下。廓爾平常。徹證無心。觀一切法。如夢幻泡。空豁豁地。隨時應節。消遣將去。隨自_己力量。轉化未悟。同入無為無事法性海中。則出來南閻浮提打一遭。必不為折本也。

是故佛說菩薩心(至)利益一切眾生故應如是布施。

六塵中。一箇色字。最易染著。色即是空。空即是色。識得他破。無過於佛。故又獨摘出言之。惟不應住六塵而生心念。是故菩薩的心。謂六度以布施為首亦不應住於色而行布施。何也。祇為一切眾生。不可令彼羸此紬。須均被其澤。始有以利益之。應當如此不住色布施也。其餘聲香味觸法之不應住。又可推_己。故

華嚴經云不為自身求歡樂。但為救護諸眾生。傳頌曰。菩薩懷深智。何時不帶悲。投身憂虎餓。割肉恐鷹饑。精勤三大劫。曾無一念疲。如能同此行。皆得作天師。川禪師云。有佛處不得住。無佛處急走過。三十年後。莫言不道。頌曰。朝遊南嶽。暮往天台。追之不及。忽然自來。獨坐獨坐無拘繫。得寬懷處且寬懷。

如來說一切諸相(至)又說一切眾生即非眾生。

若說是諸相原有相。無怪乎人之有住也。如來所說諸相。以凡有相者。終有敗壞。皆是虛妄。人身中原自有真常不滅之相。並不見有真實形迹。故云即是非相。但人迷即眾生悟即是佛。若能斷諸妄念。見自佛性。即非眾生非原有眾生之定名也。川禪師云。別有長處不妨拈出頌曰不是眾生不是相。春暖黃鶯啼柳上。說盡山雲海月情。依前不會空惆悵。空惆悵。萬里無雲天一樣。

須菩提如來是真語者(至)不誑語者不異語者。

真語。無一毫偽。實語無一毫虛。如語。契真如之語。不誑語。不誑惑人。不異語。不作怪誕語。蓋如來一言一語。皆從清淨心中流出。故言此五者。令人生信心。毋疑心。傳頌曰。眾生與蘊界。名別體非殊。了知心似幻。迷情見有餘。真言言不妄。實語語非虛。始終無變異。性相本來如。川禪師云。知恩者少。負恩者多。頌曰。兩箇五百是一貫。阿爺原是丈夫漢。分明對面報渠言。爭奈好心無好報。真語者。實語者。呵呵呵。喏喏喏。

須菩提如來所得法此法無實無虛。

欲言其實。無形可觀。無相可得。欲言其虛。時時呈露。處處周圓。此真空無相之妙法也。然如來法無所得。何故說一得字。蓋如來所得之法。正是此無實無虛心法。不可以言得也。所以人不可著相求。傳頌曰。證空便為實。執我乃成虛。非空亦非有。誰

有復誰無。對病應施藥。無病藥還祛。須依二空理。穎脫入無餘。川禪師云。水中鹽味。色裏膠青。頌曰。硬似鐵。軟如酥。看時有。覓時無。雖然步步常相守。要且無人識得渠。咦。

須菩提若菩薩心住於法(至)日光明照見種種色。

佛言。設若修行人求證佛果其心於法。尚有所執住。縱然能行布施。亦未能了徹真空。故如人入暗室中。茫無所見。若心一無住著。則隨布施。隨渾忘。此心圓融。何微弗徹。譬如人本有眼目。加以日光。有不照見種種形色者乎。

須菩提當來之世(至)皆得成就無量無邊功德。

將來之世。後五百歲濁惡之時。如來雖沒。若有人知本心無相。能于此經受持讀誦。心常精進。則不著相處。慧性漸開。應當了悟人法二空。不被一切善惡。聖凡諸境惑亂。即與如來智慧同矣。任他無量無邊功德。是人皆能當下頓悟。若以佛之智慧照之。無不悉知悉見。共能成就。豈以五百歲後。遂難其人。真為第一希有耶。川禪師云。因地而倒。因地而起。向你道甚麼。頌曰。世間萬事不如常。又不驚人又久長。如常恰似秋風至。無意涼人人自涼。

○持經功德分第十五

受持此經。功德無量。

須菩提若有善男子善女人(至)受持讀誦為人解說。

佛恐人執著如來忍辱之說。徒以身布施。而于自己性。與他人性。無纖毫利益。故于十三分言之。至此復言。屢救其失。初日分謂早晨。中日分。謂中午。後日分。謂晚間。一日三時。以恒

河沙等身命布施。如是捨身。直至歷無量劫。世間原無此事。佛不過慮未來眾生。以布施求福。反染煩惱之因。故設化假喻。極言布施之多且遠也。終不若金剛經。有聞之者。一心信向。無所違逆。只此一念。聞經悟道。我人頓盡。言下即佛。將捨身有漏之福。比持經無漏之慧。實不可及。故其福德。勝彼捨身者。何況更能書寫此經。受持之。讀誦之。且為人解說。流傳今古。自種善根。又啟人之善心。日見增長。愈久而愈盛。此為出世間福。其得福也。不尤多乎。川禪師云。人天福報即不無。佛法未夢見在。頌曰。初中後發施心同。功德無邊算不窮。爭似信心心不逆。一拳打透太虛空。

須菩提以要言之(至)不可稱量無邊功德。

信心于此經得福。非私造之說也。今舉經中要領言之。所說原要人生智慧心。不可住相。非他經之溺于口耳文字者比。不可以心思口議。不可以稱算量度。功德之大。無有邊際。亦復如此。所以一生信心。遂能獲福。

如來為發大乘者說為發最上乘者說。

乘。車也。阿羅漢獨了生死。不度眾生。謂之小乘。如車乘之小者。能自載而已。緣覺之人。半為人。半為己。謂之中乘。如車乘之適中者也。菩薩智慧廣大。善能建立一切法。普度眾生。故為大乘。佛又能化度菩薩。不見垢法可厭。不見淨法可求。不見眾生可度。不見涅槃可證。不作度眾生心。亦不作不度眾生心。在大乘之上不復有乘。故為最上乘。佛言人固當信經。然是經非。根器淺薄者可得聞。當日如來于無可說中而幻為之說者。為欲度眾生為菩薩。使之空諸色相。啟發有大乘心者說也。為欲度菩薩為佛。使之得空空相念。啟發有最上乘心者說也。人若是與法兩相合。然後纔生信心。川禪師云。如斬一握絲。一斬一切

斷。頌曰。一拳打倒化城關。一脚趯翻元妙寨。南北東西信步行。休覓大悲觀自在。大乘說。最上說。一棒一條痕。一掌一握血。長沙云。百丈竿頭不動人。雖然得入未為真百丈竿頭須進步。十方世界現全身。

若有人能受持讀誦(至)阿耨多羅三藐三菩提。

今受持讀誦能自覺矣。廣為人說。能覺人矣。令其深悟。不生毀謗。大得忍力。大智慧力。大方便力。使諸學者。自悟無相之理。得見本性如來。成無上道。便與如來相印合。豈不悉知悉見是人。決定可以成就無盡藏的功德。背負曰荷。在肩曰擔。言此等人。欲使己與眾生。皆了悟此經。開發心中智慧光明。離諸塵勞妄念。皆成就佛道。把如來無上覺悟事。都以一身負任之。豈非荷擔如來阿耨多羅三藐三菩提耶。川禪師云。擘開大華手。須是巨靈神。頌曰。堆山積岳來。一一盡塵埃。眼裏瞳人碧。胸中氣若雷。出邊沙塞靜。入國貫英才一片寸心如海大。波清幾見去還來。

○心佛頌曰。佛即心兮心即佛。心佛從來皆妄物。若知無佛復無心。始是真如法身佛。佛佛佛。沒模樣。一顆圓光含萬象。無體之體即真體。無相之相即實相。非色非空非不空。不動不靜不來往。無異無同無有無。難取難捨難指望。內外圓明到處通。一佛國在一沙中。一粒沙含大千界。一箇身心萬箇同。知之須會無心法。不染不淨為淨業。善惡千端無有無。便是南無大迦葉。

何以故須菩提(至)聽受讀誦為人解說。

所以稱其荷擔如來無上正覺者。何也。其人真能有大乘最上乘之心也。設使是人所樂者。是小乘教法。必愚鈍之量。局于見聞之小。不能聽信廣大無上菩提。只修福慧六道輪迴因果之法。縱能

強學。執著多聞。不免有我人等見之私。即不能聽受讀誦為人解說此經之義。豈能得正法如荷擔乎。勇禪師云。顏色規模恰似真。人前拈弄越光新。及乎人火重烹試。到了歸終是假銀。川禪師云。仁者見之謂之仁。智者見之謂之智。頌曰。不學英雄不讀書。波波役役走長途。娘生寶藏無心用。甘作無知餓死夫。爭怪得別人。

須菩提在在處處(至)以諸華香而散其處。

在在處處。所在之處不一。自身持誦。復為人解說。隨其所在之處。皆有此經。如摩尼寶珠。瑞光輝煥。足以感天地。動鬼神。一切世間。凡在天道。人道。阿修羅道者。所應供養。當知此有經之處。即是如來境界。宛然如真身舍利寶塔在前。無不生恭敬心。圍繞作禮以歸依。將諸花香列其處。無所不用其恭敬。若非受持真經。必不可得。傳頌曰。所作依他性。修成功德林。終無趨寂意。唯有濟羣心。行慈悲廣大。用智智能深。利他兼自利。小聖詎能任。川禪師云鎮州蘿蔔雲門糊餅頌曰。與君同步又同鄉。起坐相從歲月長。渴飲饑餐常對面。不須回首更思量。

○能淨業障分第十六

心能清淨。凡諸罪業皆消不足為障。

復次須菩提若善男子(至)得阿耨多羅三藐三菩提。

先世。指前生。亦可就現在論。如昔日作惡。今日向善。在世上改換一番。亦為先世。佛言。持此真經應為天人恭敬。今或有疾患貧窮。反為人輕賤憎惡。便謂讀經無益。福報為虛語。遂生疑惑。有退轉心。殊不知非經無功德。蓋是人先世。曾作無量罪業。應墮惡道。不得令終。今藉此持經之力。不過遭人輕賤。先世罪業。悉皆冰消火滅。不復墮落惡道。豈止僅僅滅罪而已。將

來必得佛果菩提。誰謂持經不大有益耶。張無盡云。四序炎涼去復還。聖凡只在剎那間。前人罪業今人賤。倒却前人罪業山。傅頌曰。先身有報障。今日受持經。暫被人輕賤。轉重復還輕。若了依他起。能除遍計情。常依般若觀。何慮不圓成。川禪師云。不因一事。不長一智。頌曰。讚不及。毀不及。若了一。萬事畢。無欠無餘若太虛。為君題作波羅密。

○人往往為邪淫悖逆事。若論天理。應該自身受譴。兒孫受殃。嘗見有此等人。一旦追悔前非。歸依經教。學做好人。雖先前罪過。不免人之指觸輕賤。今已實心向善。不復為惡干犯刑憲。貽害後代。自新者如此獲福。況未嘗作惡者。又能持經。豈不更得福慶。

須菩提我念過去無量(至)算數譬喻所不能及。

梵語阿僧祇。華言無數。那由他。華言一萬萬。佛言。我思念過去無量無數的世界遭其劫難。皆因經教不明。故我于然燈佛前授記時。得遇萬萬不可勝算諸佛。悉皆供養承事。無一佛使虛過者。惟慮無以闡明佛法。而垂之經也。然我身猶幸遇諸佛。是法盛時節。猶可易及。至于後末世。將復受劫之時。教法凌夷。僅存一綫。于此得持經之人。悟無生理。息希望心。遠離眾生顛倒知見。即到波羅彼岸。永出三塗。證無餘涅槃。真是砥柱中流。衍佛教于不斷者也。凡人終日供養。只求福田。不求出離生死苦海。自性若迷。福何可救。以此人較量功德。我雖有供佛功德。百分百千萬億分。尚不及其一分也。即使強為算數。強為譬喻。彼却功德甚大。安能及之。川禪師云。功不浪施。頌曰。億千供佛福無邊。爭似常將古教看。白紙上邊書黑字。請君開眼目前觀。風寂寂。水漣漣。謝家人祇在漁船。

須菩提若善男子善女人(至)果報亦不可思議。

具。詳也末世眾生。德薄垢重。嫉妒彌深。眾聖潛隱。邪見熾盛。故上文只概言功德之大。引人精進若還詳說其大。又恐愚人聞之。心生狂亂。狐疑不信。反阻向道之心。所以但使人知功德之大。而不詳言。要之是經所說。原都是說無相。其義趣原不可心思。口議。人依此經修行。所得功德之果報。亦豈可容思議哉。果者。如花成實。報者如響應聲。理之必然也。川禪師云。各各眉毛眼上橫。頌曰。良藥多苦。忠言逆耳。冷暖自知。如魚飲水。何須他日待龍華。今朝先受菩提記。

金剛經如是經義卷上

金剛經如是經義卷下

○究竟無我分第十七

究竟佛法本無我體。

爾時須菩提白佛言世尊(至)無有一眾生實滅度者。

上說修行人。不可思議。須菩提。遂轉憶初問安住降伏。未免猶著思議。故再問之。佛言。菩提之心。人人皆有。等為物欲所蔽。時生妄想貪嗔取舍。一切不善心。人欲還其本有。當生這箇菩提心。猶如虛空無染無雜。大日輪照四天下。日升之時。明徧天下。虛空不曾明。日沒之時。暗徧天下。虛空不曾暗。明暗之境。自相凌奪。虛空之性。廓然不變。自然發生。不礙真性。與安住降伏。著實用功者不同。一切眾生。原無不善心。因貪財色。恩愛情重。方有此心。性頑鈍者。總在夢中。有利根者。一撥即轉。故我應度一切眾生。不過以無我心。將忍辱以降伏。令邪惡不生。不起能度之一念。亦不見所度之眾生。故我即度脫眾生成佛已盡。而實無有一眾生。是我滅度者也。川禪師云。有時因月好。不覺過滄洲。頌曰。若問云何住。非中及有無。頭無纖草蓋。足不履閻浮。細似鱗虛杓。輕如蝶舞初。眾生滅盡知無滅。此是隨流大丈夫。

何以故須菩提(至)阿耨多羅三藐三菩提心者。

滅度眾生已了。不見是我滅度者。無四相也。蓋人有四相。即見有眾生可度。仍有能度眾生心。謂涅槃可證可求。反是煩惱根本。菩薩心常空寂。澹然虛靜。本無四相。所以無四相者。何也。萬法皆從心生。究其實。真性中。蕩蕩空空。一法不立。一塵不染。何曾有法以發此菩提心。是故人能自然發生其心者。即當化度。而非菩薩之實能度也。傳頌曰。空生重請問。無心為自

身。欲發菩提者。當了現前因。行悲疑似妄。用智最言真。度生權立我。證理即無人。川禪師云。少他一分又爭得。頌曰。獨坐翛然一室空。更無南北與西東。雖然不借陽和力。爭奈桃花一樣紅。

須菩提於意云何(至)如來得阿耨多羅三藐三菩提。

佛言。不但眾生實無法名菩提心。汝試云。我於師處。有法得之名為無上正等正覺不。須菩提深解無相之理。謂若有般若了悟心在。即是有法。尚有所得之心。故言不也。其言契合于佛心。故佛稱如是如是。深然之也。川禪師云。若不同牀睡。怎知紙被穿。頌曰。打鼓弄琵琶。相逢兩會家。君行楊柳岸。我宿渡頭沙。江上晚來初雨。過數峰滄翠接天霞。

須菩提若有法如來得(至)如來者即諸法如義。

授記者。命之了悟真性以成佛也。來世。猶言後日。梵語釋迦。華言能仁。謂心性無邊。能含容廣度一切也。牟尼。華言寂默。謂心體清淨。動靜不干也。佛言。若于法有所得。是為執相。即有心在。便同凡夫。然燈焉得與我授記。惟其無得。心上無纖毫停留。自性清淨。故方授記于來世得成佛也。其故謂何。以如來之所以得名者。即能了諸法空相。得如如之義。一切諸法。本來清淨。由取捨分別。所以濁亂。不得自如。心若清淨。自然如中天杲日。歷歷分明。于諸法上。都無取舍分別。真性徧虛空世界。如常自如。故謂之如。既空諸法。自然有感即通。故謂之來。非性中原有法也。但于六塵中不生分別。而本體湛然。不染不著。曾無變異。如空不動。圓通瑩徹。歷劫長存。是名諸法如義。使謂實有所得。纔可成佛。何以稱名為如來。慈受禪師云。一顆靈丹大似拳。服來平地便升仙。塵緣若有絲毫在。蹉過蓬萊路八千。龍牙和尚云。深念門前樹能為澹泊棲。來者無心喚。去

者不慕歸。若人心似樹。與道不相違。傳云。人與法相待。二相本來如。法空人是妄。人空法亦祛。人法兩無實。受記可非虛。一切皆如幻。誰言得有無。又云。法性非因果如理不從因。謂得然燈記。甯知是舊身。川禪師云。貧似范丹氣如項羽。頌曰。上無片瓦。下無立錫。日往月來。不如是誰。噫。又云。住。住。動著則三十棒。頌曰上是天兮下是地。男是男兮女是女。牧童撞著看牛兒。大家齊唱囉囉哩。是何曲調。萬年歡。

若有人言如來得阿耨多羅(至)於是中無實無虛。

凡言得者。皆自外來。真性豈外來之物。若有人言。佛得無上正等正覺之真性。是為妄語。當知佛所得菩提果。原是本來真性。正覺之法。本非性中所有。何處可執著萬行悉備。恒沙德用。何處不發現。故無實無虛。人惟當心悟此法。何可言有所得哉。川禪師云。當嫌千口少。貧怨一身多。頌曰。生涯如夢若浮雲。活計都無絕六親。留得一雙清白眼。笑看無限往來人。

是故如來說一切法(至)是故名一切法。

法惟無所得。是故如來說世間一切諸法。將謂為實。向甚處摸索。若以為虛。何處不分明。但能色相俱空。不著不染。從此脫離。皆可稱為佛法。然性體本空。所謂一切法者。其實非有一切法也。人不得不假此以修行。故虛名之為一切法耳。川禪師云。明明百草頭。明明祖師意。頌曰。會造逡巡酒。能開頃刻花。琴彈碧玉調。爐煉白丹砂。幾多伎倆從何得。須信風流出當家。又云。上大人。邱乙己。頌曰。是法非法不是法。死水藏龍活鱗鱗。是心非心不是心。逼塞虛空古到今。祇者是。絕追尋。無限野雲風捲盡。一輪孤月照天心。

○馬祖云。一切眾生。從無量劫來。不出法性三昧。長在法性中著衣吃飯。言談祇對。六根運用。一切施為。盡是法性。不解返源。所以隨名逐相。迷情妄起。造種種業。若能一念迴光返照。全體聖心。何處不是佛法。

須菩提譬如人身長大(至)即為非大身是名大身。

佛言。譬如人之身。雖長且大。意謂人若心不菩提。此身空自長大。以顯一切眾生法身不二。無有限量。須菩提與佛一心。嘗聞佛說此語。故不待譬喻完。即答云。如來說人身長大。是法身無相。廣大無邊。若色身有相。內無智慧。即為非大身。故非真實有大身。但虛名之耳。知大身之非身。則知一切法者。誰是一切法。豈可謂其實有所得。又豈可謂實能滅度眾生耶。川禪師云。喚作一物即不中。頌曰。天產英靈六尺軀。能文能武善經書。一朝識破娘生面。方信閒名滿五湖。

須菩提菩薩亦如是(至)無我無人無眾生無壽者。

豈惟佛哉。即菩薩亦不可知有滅度。菩薩到處皆行方便。不可以有心為之。夫色身長大。爭奈有生滅。有限量。即非大身。二乘之人。有煩惱妄想。不能除滅。即同凡夫。滅色取空。不了色性。即非菩薩。若造作此言。我當化度眾生。未免有心。不知色性自空。非色滅空。如病眼人。見空中花。無有是處。何以名為菩薩。其故謂何。蓋心迷即眾生。心悟即成佛。一切空寂。本來不生。不見有生死。不見有涅槃。不見有善惡。不見有聖凡。不見一切法。正見之時。了無可見。故滅度而實無有滅度之法。所以得名為菩薩。惟其實無有法。是故佛於無可說中。說一切法。皆是真空無相。絕無有我人眾生壽者四相。夫法本無相。安得以滅度為己功乎。傳云名因共業變。萬象即微生。若悟真空色。脩

然獨有名。川禪師云。喚牛即牛。呼馬即馬。頌曰。借婆衫子拜婆門。禮數周旋已十分。竹影掃堦塵不動。月輪穿海水無痕。

須菩提若菩薩作是言(至)即非莊嚴是名莊嚴。

自認滅度。心不清淨可知。設有有心要求清淨。說我當莊嚴佛土。即便著相。不可稱為菩薩。何也佛土者。自心淨土也。本來清淨。無相可以莊嚴。惟有妙莊嚴之理。存乎其中。故所說莊嚴佛土者。非實有莊嚴也。但虛名而已。豈有菩薩而猶著於相耶。

須菩提若菩薩通達無我法者如來說名真是菩薩。

知有我即非菩薩。究竟何以名菩薩。必把我一身看得十分透徹。知身非我有。法非我得。人與法雙忘。纔是真正名為菩薩。楞伽經云。二無我。謂人無我。法無我。人無我者。謂人無本體。因業而生。法無我者。謂法無本體。因事而立。若作富貴之業。則生于富貴中。作貧賤之業。則生于貧賤中。是人無本體也。如因欲渡水。則為舟楫之法。因欲陸行。則為車輿之法。是法無本體也。一切法因事而立。皆為假合。假合即是虛妄。若信此理而悟解之。是真菩薩。菩薩不可執一我相況如來菩提之心。誰謂有法以發之。川禪師云。寒即普天寒。熱即普天熱。頌曰。有我原無我。寒時燒軟火。無心似有心。半夜拾金針。無心無我分明道。不知道者是何人。呵呵。

○一體同觀分等十八

萬法歸一。更無異觀。

須菩提於意云何(至)如是世尊如來有佛眼。

前說無我。是說無妄心非并說無覺性也。故言佛有覺性。而先舉清淨五眼問之。化身觀見于世間。開化眾生。見色身起滅。內外空寂。謂之肉眼。見自真性。是法平等。普照大千。謂之天眼。見自性中般若。智燭常明。照徹眾生性靈深淺。謂之慧眼。見諸色相。心不動搖。了諸法空。遍充三界。謂之法眼。見前際無煩惱可斷。中際無自性可守。後際無佛可求。三際清淨。本性常覺。破諸空妄。謂之佛眼。凡夫與如來。同具此五眼。但為物欲所蔽。不能常明。如來真空無我。性體湛然清淨。自無纖毫障翳。傳頌云。天眼通非閤。肉眼閤非通。法眼唯觀俗。慧眼直緣空。佛眼如千日。照異體還同。圓明法界內。無處不含容。川禪師云。盡在眉毛下。頌曰。如來有五眼。張三祇一雙。一般分皂白的的別青黃。其間些子爻訛處。六月炎天下雪霜。

須菩提於意云何(至)若干種心如來悉知。

有一世界。必有一佛設化。故曰佛世界。佛以恒河之沙。喻世界之廣。更舉無窮之沙。喻眾生種種妄念。若干種心如來悉知者。眼耳鼻舌身意。凡起心動念處。即是國土。于國土中所有眾生。若干種種差別之心。心數雖多。總名妄心。既覺是妄。故云悉知。如來惟具足五眼。是覺性常具足矣。故能無不悉知其心。川禪師云。曾為浪子偏憐客。慣愛貪杯識醉人。頌曰。眼觀東南。意在西北。將謂猴白。更謂猴黑。一切眾生一切心。盡逐無窮聲與色喝。

何以故如來說諸心皆為非心(至)未來心不可得。

諸心即若干種心。吾心本一。何得有若干種心。如來所以能悉知者。何也。以諸心總是妄心。但因其從心而起。不得不名之為心。原非真實之心也。所以識其非心者何也。此心太空。毫無所累。說不得他有過去現在未來心。所以說若干種心。皆是非心。

而如來無不知之也。要知三心只一心。本來無有。因事而起。事過即滅。如言語時。是現在。未出口。謂之未來。一出口。即為過去。又如人思食之時。則欲食之心為未來。得食之時。則欲食之心為現在。食畢放箸。則欲食之心為過去。不甚相遠。傳頌曰。依他一念起。俱為妄所行。便分六十二。九百亂縱橫。過去滅無滅。當來生不生。常能作此觀。真妄坦然平。圓悟禪師頌曰。欲識平常道。天真任自然。行船宜舉棹。走馬即加鞭。若遇饑來飯。還應困即眠。盡從緣所得。所得亦非緣。川禪師云。病多諳藥性。頌曰。一波纔動萬波隨。似蟻循環豈了期。咄。今日與君都割斷。出身方號丈夫兒。又云。低聲。低聲直得鼻孔裏出氣。頌曰。三際求心心不見。兩眼依前對兩眼。不須遺劍刻舟尋。雪月風花常見面。

○法界通化分第十九

佛法充滿世界。無不通達感化。

須菩提於意云何若有人滿(至)如來說得福德多。

總是說心無相。以是因緣得福者。以布施的緣。故得福。是有漏有礙之寶。非清淨無為功德。蓋福田心造。佛言。若心中果實有此福德。則福德非外來。何以言得。惟是本無一物。本無此福德藏在心中。故如來不止言得。而更言多。若有菩薩。以盧舍那身中七寶菩提。持齋禮讚。從其心燈。化生功德。不生不滅。堅如金剛。乘香花雲。入無邊界。起光明臺。供十方一切諸佛。此無為功德。見性之施。化為菩薩。頌曰。廣將七寶持為施。如來不說福德多。若用心燈充供養。威光遍照滿婆娑。

○離色離相分第二十

色相皆妄。離之即見性。

須菩提於意云何(至)是名具足色身。

色身者。皮肉形軀也。具足者。無少欠缺也。佛恐眾生不悟佛心無相。即心可以成佛。但見此具足色身便為如來。故復問之。不知此乃是幻身。究竟還歸烏有。佛全不在此。故云即非具足色身。明禪師云。養就家欄水牯牛。自歸自去有來由。如今穩坐深雲裏。秦不管兮漢不收。川禪師云。官不容針。私通車馬。頌曰。請君仰面看虛空。廓落無邊不見蹤。若解轉身些子力。頭頭物物總相逢。

○僧問趙州。狗子有佛性麼。州云。無。進云。蠢動含靈皆有佛性。為什麼狗子無佛性。州云。為他有業識在。夫有業識之人。種種著于有。起諸妄想者。名顛倒知見。種種著于空。都無所悟者。名斷滅知見。宿有善根之人。無此二病。洞曉空趣。此名真正知見。若悟此理。乃可隨時著衣吃飯。長養聖胎。任運過時。更有何事。

須菩提於意云何(至)是名諸相具足。

具足色身。佛猶與人同。三十二相。獨如來有之。若執此求如來。祇見化身。不知如來離色離相。以淨行。則具足三十二。以智慧。則具足八萬四千。其實覺性猶虛空。故再辨之。傳頌曰。八十隨形好。相分三十二。應物萬般形。理中非一異。人法兩俱遣。色心齊一棄。所以證菩提。實由諸相離。

○四祖謂牛頭融禪師云。百千妙門。同歸方寸。恒沙功德。總在心源。一切定門。一切慧門。一切行門。悉皆具足。神通妙用。只在你心。業障煩惱。本來空寂。一切果報。性相平等。大道虛曠絕思絕慮。如是之法。無欠無餘。與佛無殊。更無別法。但只令心自在。莫懷妄想。亦莫歡欣。莫起貪嗔。莫生憂慮。蕩蕩無

礙。任意縱橫。不作諸善。不作諸惡。行住坐臥。觸目遇緣。皆是佛之妙用。

○非說所說分第二十一

法無可說。所說者。非性之真。

須菩提汝勿謂如來是念(至)不能解我所說故。

如來不在身相。人猶易曉。然佛法是如來所說。恐人復執此以求如來。故曰汝勿以如來曾作此說法念也。何也。非法無以談空。非人無以說法。此謂不同生滅之心。故有法可說。如來雖說法。未嘗執取一樣法。若以有生滅心而為說法。是教一切人不能得見自性。即為謗毀如來。不能解悟我所說如來無相之義。我故曰莫作是念。川禪師云。是即是。大藏小藏。從甚處得來。頌曰。有說皆為謗。無言亦不容。為君通一線。日出嶺東紅。

須菩提。說法者。無法可說。是名說法。

本來無法。特為眾生去除外妄。不得已而說法。然不過隨感隨應。實無有一定法可說。但虛名為說法而已。若眾生既悟。并法亦無可用。安得謂如來實有所說法耶。傳云。相寂名亦遣。心融境亦亡。去來終莫見。語默永無妨。智入圓成理。身同法性常。證真還了俗。不廢是津梁。川禪師云。兔角杖。龜毛拂。頌曰。多年石馬放毫光。鐵牛哮吼入長江。虛空一喝無踪跡。不覺潛身北斗藏。且道是說法。不是說法。

○顏丙曰。終日吃飯。不曾咬著一粒米。終日著衣。不曾掛著一莖絲。所以我佛橫說豎說。四十九年。未嘗道著一字。唯同道方知。若言如來有所說。即為謗佛。不能解會我所說。直饒說得天花亂墜。也落在第二著。若能坐斷十方。打成一片。非言語可

到。是名真說法也。所以道。地壁瓦礫。說禪浩浩。前輩頌曰。也大奇。也大奇。無情說法不思議。若將耳聽終難會。眼處聞聲方得知。

爾時慧命須菩提白佛言(至)說非眾生是名眾生。

言慧命者。以須菩提具智慧性故稱之。即如稱長老一般。無法可說。後世眾生便難信解。故須菩提問生信心不。佛言。人無定品。皆具真一之性。與佛同源。詎可以眾生目之。因彼背真逐妄。自昧其靈。又不可以不是眾生目之。豈謂生信心者。後世遂無其人。何也。眾生之為眾生。特因未悟而名之耳。若悟了。亦即是佛。如來何嘗說他是真實眾生。不過虛名之而已。智者禪師頌曰。不言無所說。所說妙難窮。有說皆為謗。至道處其中。多言無所解。默爾得三空。智覺剎那頃。無生無始終。川禪師云。火熱風動。水濕地堅。頌曰。指鹿豈能成駿馬。言烏誰謂是翔鸞。雖然不許纖毫異。馬字驢名幾百般。

○無法可得分第二十二

真性全空故無法可得。

須菩提白佛言世尊(至)是名阿耨多羅三藐三菩提。

須菩提既明無法可說。遂悟佛所得菩提之道。內覺身心空。外覺境緣空。破諸色相。勿令執著。無有秋毫之障。微塵之染。故以為無所得。佛言如是如是者。深許其言之當也。無有法加一少字。絲毫亦不有也。言我於此理。亦無少法可得。菩提亦是虛名。草堂清和尚云。擊石乃出火。火光終不然。碧潭深萬丈。直下見青天。川禪師云。求人不如求己。頌曰。滴水生冰信有之。綠楊芳草色依依。春花秋月無窮事。不妨閒聽鷓鴣啼。

○禪師云。念念釋迦出世。步步彌勒下生。分別現文殊之心。運用動普賢之行。門門而皆出甘露。味味而盡是醍醐。不出旃檀之林。長處華藏之境。若如此也。行住坐臥。觸目遇緣。雖應用千差。且湛然清淨。

○淨心行善分第二十三

以清淨心行諸善法。

復次須菩提是法平等無有高下(至)三藐三菩提。

法即是菩提心。佛與眾生。皆具此性。無增無減。均平相等。無有高下。然實無形也。特強名為無上正等正覺。黃蘗禪師云。若觀佛作清淨光明解脫之相。觀眾生作垢濁暗昧生死之相。作此解者。歷恒河沙劫。終不能得阿耨菩提。又云。心若平等。不分高下。即與眾生諸佛。世界山河。有相無相。徧十方界。一切平等。無彼我相。此本源清淨心。常自圓滿。光明徧照也。傳頌曰。水陸同真際。飛行體一如。法中何彼此。理上豈親疎。自他分別遣。高下執情除。了斯平等性。咸共入無餘。

以無我無人無眾生無壽者(至)即非善法是名善法。

所以名為無上正等正覺者。以真性中本無我人眾生壽者四相。乃從妄緣中現。而真性則平等。不可使他或得或失。若以無四相之心。修行一切無我真空的善法。於一切事。無染無著。於一切境。不動不搖。於一切法。無取無捨。於一切時。常行方便。隨順眾生。令皆歡喜。而為說法。令悟菩提真性。勿使虧欠。則覺性便不失墜。未有不得也。然所謂善法者。本來無此善法。但假此名。直教一切善惡凡聖無取捨愛憎之心。平常無事。故云即非善法。以開悟眾生。本不是住於相。川禪師云。山高水深。日生月落。頌曰。僧是僧兮俗是俗。喜則笑兮悲則哭。若能於此善參

禪。六六從來三十六。又云。面上夾竹桃花。肚裏侵天荊棘。頌曰。是惡非惡。從善非善。將逐符行。兵隨印轉。有時獨上妙高峯。却來端坐閻王殿。見盡人間祇點頭。大悲手眼多。方便。

○福智無比分第二十四

持經者福智最多。無可比並。

須菩提若三千大千世界中(至)算數譬喻所不能及。

上言性中無善法。恐人以經文為空言。不知受持故此又較量施寶福德。以大千世界中。所有須彌山王。上至忉利天。下至崑崙際。若有將七寶如此之高。持用布施。其獲福雖百千萬億分。僅為住相布施。終無解脫之時。總不如受持讀誦此經。乃至四句偈等所得無住相淨妙功德之一。可見佛。若不設經救。一切眾生無由入悟。憑何修行。得到佛地。傳頌曰。施寶如沙數。惟成有漏因。不如無我觀。了妄乃名真。欲證無生忍。要假離貪嗔。人法知無我。逍遙出六塵。川禪師云。千錐筍地。不如鈍鋤一捺。頌曰。麒麟鸞鳳不成羣。尺璧寸珠那入市。逐風之馬不並馳。倚天長劍□□比。乾坤不覆載。劫火不能壞。凜凜威光混太虛。天上人間總不如。噫。

○化無所化分第二十五

雖化度眾生。心無化度。

須菩提於意云何(至)如來即有我人眾生壽者。

如來設立經教。雖曰以度眾生為事。然未嘗有度眾生之心。故誡云。汝等勿謂也。眾生具無盡煩惱妄想。於一切善惡凡聖等見。取捨分別。迷情蓋覆菩提之性。業障深重。佛一出世。教令覺

悟。降六賊。斷三毒。除人我。令能回光返照。即見自性。更不停留纖毫凝滯。聞經徹悟。自然歸於化度。不過還其本有智慧心而已。實無有眾生如來度者。若言眾生是如來化度。則如來便有我人等四相之私矣。傳頌曰。夜夜抱佛眠。朝朝還共起。起坐鎮相隨。語默同居止。纖毫不相離。如身影相似。欲識佛去處。只這語聲是。川禪師云。春蘭秋菊。各自馨香。頌曰。生下東西七步行。人人鼻直兩眉橫。哆喇悲喜皆相似。那時誰更問尊堂。還□記在麼。

○園悟禪師云。赤肉團上。人人古佛家風。毗盧頂門。處處祖師巴鼻。若也恁麼返照。凝然一段光明。非色非心。非內非外。行棒也打他不著。行喝也驚他不得。直得淨裸裸。赤洒洒。是箇無生法忍。不退轉輪。截斷兩頭。歸家穩坐。正當恁麼時。不須他處覓。祇此是西方。

須菩提如來說有我者(至)即非凡夫是名凡夫。

如來既無我人等相。何又云我。須知假名稱我。對所度眾生。隨世說我。而自性中。當體空寂。原不著有我相。惟凡夫妄認之以為有我。其實三世諸佛。皆無所有。惟有自心既明。因果無差。乃知心外無法。非有我也。就是所稱為凡夫者。欲離生死而求涅槃。欲捨煩惱而求滅度。執著一邊。不了中道。究竟皆不著□□可成佛。豈真有實凡夫哉。但虛名耳。凡夫自能成□。雖謂之自度可也。如來曾何功耶。智者禪師頌曰。□生修因果。果熟自然圓。法船自然度。何必要□。□□似捕魚者。得魚忘却筌。若道如來度。從來度□□。□禪師云。前念眾生後念佛。佛與眾生是何物。頌曰。□見三頭六臂。却能拈匙放筯。有時酒醉罵人。忽爾□香作禮。手把破沙盆。身披羅錦綺。做模打樣□□□。驀鼻牽來祇是你。嘎。

○法身非相分第二十六

清淨法身。非屬相貌。

須菩提於意云何(至)不應以三十二相觀如來。

身相不可觀如來。須菩提前已言過不也。何故此處言如是如是。亦謂此相為如來所獨具也。不知觀如來者。但當契清淨本來心。若以三十二相觀如來。則執相之見猶未除。故言轉輪聖王。亦有三十二□。□泥形相。彼將亦是如來矣。豈若是乎。轉輪聖王□□四天王。管察世間善惡。正五九月。照南閻浮提。□□十月。照西瞿耶尼。三七十一月。照北鬱單越。四□□二月。照東拂婆提。常如輪之轉。故名轉輪聖王。□□云。臨池喚影終無益。觀鏡攀花未是奇。□□□□實相。相忘心滅却依誰。川禪師曰。錯。頌曰。泥塑□□兼綵畫。堆青抹綠更裝金。若將此是如來相。笑□□無觀世音。又云有相身中無相身。金香爐下□□□。頭頭盡是吾家物。何必靈山問世尊。如王秉劍。

爾時世尊而說偈言(至)是人行邪道不能見如來。

我。謂佛性也。乃真性之佛。無形無相。不可以形色見。亦不可以音聲求。世尊因見須菩提。疑信相半。故於爾時說偈言曰。如來只在自心。法體清淨。猶若虛空。無有染礙。不落一切塵境。視之不見。言其有色相不可。聽之不聞。言其有音聲不可。若欲以此二者。求見我。是不見正覺常住之真佛性。不能返觀內照。即性而修。此等人舍正路而不由。不能見如來於方□□聞。蓋因其不反求本心也。川禪師云。直饒不□□□聲求。亦未見如來在。且道如何得見。不審不審。□□。見色聞聲世本常。一重雪上一重霜。君今要見□□面。走入摩耶腹內藏。噫。此□三十年後。

○無斷無滅分第二十七

性體具足。不生斷滅。

須菩提汝若作是念(至)得阿耨多羅三藐三菩提。

此二節。說具足相。論清淨法身。不可以相貌取□□其詞而語須菩提曰。此性。如來與眾生皆有。本無少欠。故名具足相。不可以色見聲求。然溺於無相。又恐淪於空寂。蓋性含萬法。應用徧知。去來自由。無所罣礙。原非一味空寂。惟以此具足之性。有正覺。故得證菩提果。若作是念。謂如來不以具足性得菩提果。未免入於槁情滅念。何以為如來。故又正其詞而謂之曰。莫作是念。智者禪師頌曰。相相非有相。具足相無憑。法法生妙法。空空體不同。斷滅不斷滅。知覺悟深宗。若無人我念。方知是至公。

須菩提汝若作是念(至)於法不說斷滅相。

此二節。佛恐眾生執於無法沉迷空寂。□□□□□□其詞而語須菩提曰。□作有相觀。即□□□□。若作無相觀。亦是一邊見。人豈可泥於相。但說□□盡當斷絕消滅。此便非清淨心。何可作是念。其□□何。蓋既悟之後。法亦歸空。未悟之前。必當依□□□修行。於法不可有斷滅相。譬如渡水。渡後固□□□楫。未渡之前。非舟楫何由以濟。故又正其辭而語之也。川禪師云。翦不齊兮理還亂。拽起頭來割不斷。頌曰。不知誰解巧安排。捏聚依然又放開。莫謂如來成斷滅。一聲還續一聲來。

○不受不貪分第二十八

不受福德。無所貪著。

須菩提若菩薩以滿恒河沙等(至)是故說不受福德。

通達一切法。無能所心。是名為忍。說箇忍字□□□制之意。初住菩薩如此。後來得成無我地位。却□□兩空。不必強制。故曰。無我□成於忍。佛□□□□修行之法。未免有我施彼□之相。若□□□□□不生。無我得成於忍。所得福德。更勝於前菩□□□七寶布施等福所能比。何也。不受福德故□□□□受。蓋受則有貪戀之意。如眼對色。謂之見□□□□之聞。見聞是根。聲色是塵。凡夫被妄心所覆□□□轉。即有生滅。故塵起即心起。塵滅即心滅。不知所□生滅心。皆是妄念。菩薩了悟真性。活潑潑地。洞然同於太虛。色聲未對之時。我性常見常聞。未曾暫滅。色聲相對之時。我性未嘗暫生。所作福德不為自_己受享世間福利。全為利益一切眾生。積福□□□□□_已。故不應有所貪戀住著也。以此□□□□□□其不受。豈同於布施著相者。□□□□□□□□有為相。三生却被吞。七寶多行□□□□□□□諸有欲。旋豈愛情恩。苦□無貪相。應到□□□□師云。耳聽如聾。口說如啞。頌曰。馬下人因□□□。□高有下有疏親。一朝馬死人歸去。親者如□□□□。只是舊時人。改却舊時行履處。又云。裙無腰□□□。□曰。似水如雲一夢身。不□□外更□□。□□□□□他物。分付黃梅路上人。□□道歌□□□□□天福。猶如仰箭射虛空。勢力盡。箭還墜。招得□□□如意。蓋言人天福報。便是三生業緣。少有□□□□得受福力。不明其本。愈冀□添。以此世福。□□□□臨命終時。福盡業在。列□惡道。受種種□□□□□來生不如意也。

○威儀寂靜分第二十九

四歲□□□□□□□動於相。

須菩提若有人言(至)亦無所去故名如來。

釋。來去坐臥本。文分明不釋□□□□□□□□虛。作同字看
所處所也。無所從□□□□□□□□無所去猶言無處所去
□□□□□□□□□□□□□□□□□□□□詳確惟
□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□。

○一合理相分第三十

須菩提若善男子善女人(至)但凡夫之人貪著其事。

○知見不生分第三十一

須菩提若人言佛說我見(至)即非法相是名法相。

○應化非真分第三十二

須菩提若有人以滿無量(至)皆大歡喜信受奉行。

金剛般若波羅蜜經如是經義卷下(終)

No. 501-A

金剛般若一經。乃捨法證性之妙道。無住生心之極功。義理深微。
未易明了。雖有諸家註釋。各是其是。使後之學者。無所適從。心
都子曰。亡羊由於路歧。失道由於多方。有以哉。(休)幼時聞諸長
老云。惟如是經義一書。所解直捷痛快。三根普被。堪為斯世津
梁。於是徧搜諸方。五十年未獲。今秋道山師得殘本於普陀。惜字
簞中。携來雲林。(休)閒假之暫。閱見其文理洞徹。玄微般若。於
是乎。顯真末世金錫也。蓋般若靈光。頭頭披露。眾生埋沒已久。

此解能開發道眼。故龍天珍惜秘藏。不肯磨滅。特默授與饑窘之士。如是妙法。如是慧燈。若不刊刻流通。則湮沒竟無傳矣。恨歲久冊頁剝落。後缺三分。遂至拱璧不完。茲板而出之。如天下大道場。及各庵院。有珍藏如是經義者。請加刻其三分。以補足之。庶香飯醍醐。同霑法味。化城稚子。共悟無生。功德果報。又豈心思口議所可髣髴比量也哉。

祈懺弟子(昉休)謹啟。

CBETA 贊助資訊

[. \(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。（銀聯卡不支援定期定額）

[前往捐款](#)

劃撥捐款

郵政劃撥帳號: 5 0 4 6 8 2 8 5

戶名: 財團法人佛教電子佛典基金會

欲指定特殊用途者, 請特別註明, 我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務, 提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜, 由於付款幣別為美元, 我們除了會依您所贊助之美元金額開立收據外, 另我們會依捐款當日公告匯率開立台幣收據, 此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
